

CV de Braniemeekers

Lummel - Nazareth



Maag iech uch veurstèlle aon de nuie Hoeglöstigheid vaan CV de Braniemeekers, dee euver 't Braniemeekersriek vaan Lummel & Nazareth zal goon regere:

Prins IVO 1e

In de börgeleкке stand vaan Mestreech steit heer ingesjreve es;
Ivo, Johannes, Elizabeth Lemmens



Heer zaog zien ierste levensleech op 29 mei 1979, in Mestreech.

Nao zien geboorte woende heer op de Kestiel Elderenstraat 5 in Nazareth.

Later woende en greujde heer op in Lummel aon de Bethlehemweeg 7, same mèt Gertie zien mam, Herman ziene pap en zien broor en zuster Barry en Joyce.

Zjus wie bekans edere Lummeleer góng heer naor de bewaorsjaol "Op het Merkenveld". Dao al bleek tot 't 'ne slumme jong waar en heer góng studere aon de MAVO, HAVO en zelfs HEAO Accountancy.

In zien jäg jaore had heer versjèllende hobbies. Zoe waar dee brave jong mèssendeender en góng heer bij famfaar Juliana meziek make. 't Mies opvallende waar tot wie heer koelek 4 jaor waar, ziech same mèt mam kaom opgeve bij 't voetballe bij R.K.V.C.L. Zoe joonk waors dat neet gebrukelek mer wie me zaog wie good of heer dat kós, waors dat gein eenkel probleem. Tot heer 't noets wijer gestamp heet es R.K.V.C.L. 1 vinde vööl lui tot op vendaog nog zier biezunder.

De rije laag welliech in 't feit tot heer góng wèrke in de Horeca.

Zoe waar heer mètwèrker in discotheek Nightlive aon de Kesselskade, deeg heer de administratie vaan Mise en Place en kaom heer ummertouw dèkser oethelpe in café 't Hiltönneke dat heer oeteindelek in 2014 zelfs heet euvergenome vaan Math en Els Ritzerfeld.

Café 't Tönneke, zoe wie 't noe hèt, is zien lös en zie leve. Mèt jägdeg enthousiasme en hiel vööl gevoel veur wie me mèt joonk meh ouch zeker mèt aajd um moot goon, heet heer de kaffee gemaak tot 'n plaots boe eederein ziech op z'n gemaak veult en dus gere keump. Neet allein veur 'n gleske beer mer ouch veur gewoen 'n präötsje te make, um te kaarte, te taofelvoetballe, te biljare en te pikvoegele.

In 2016 lierde heer zien vriendin en groete leefde, Bianca Essers, kinne en kraog dao ouch in eine kier twee sjatte vaan kinder, Jian en Liana bij. Same zien zie stèllekes aon 't kieke wie zie hun leve wijer goon inriechte en boe zie ziech oetindelek goon nèstele.

In de spaorzaome tied dee heer heet wèlt heer gere 'n belke stoete bij zien eieg biljarvereniging vaan Café 't Tönneke. Ouch is heer es sponsor en lid verboonde aon voetbalclub Willem 1, boe vööl lije vaan R.K.V.C.L. nao touw ginge, wie de club vaan Lummel nao 't seizoen 2016-2017 opheel te bestoon. Ouch beleef heer vööl plezeer aon zien neefkes en nisjekes Nena, Jill en Em en aon zien petekeender Giel en Bono.

Es Mestrechteneer is heer sjus wie us allemaol opgegereujd mèt de Mestreechter Vastelaovend. En es jonge Lummeleer waar heer altied te vinde in 't Lochmanhoes boe heer vaste klant waar in de puunkrink. Vaanaof wie heer de kaffee begónne is, heet heer ziech veurgenome um d'r veur de lui te zien. Zoe ouch mèt de vastelaovend en heet heer de samewèrking gezeuk en gevoonde mèt de Braniemeekers en weure versjije activiteite same georganiseerd. Allemaol mèt 't ouch op 't leveteg hawwe vaan de vastelaovend in Lummel en Nazareth.

Wie veer Ivo vroogte of heer Lummel & Nazareth in 2019 veur zow wèlle goon in de sjoen, mer zwoer daog vaan vastelaovend, hoofde heer ziech same mèt zien vrouwke neet lang te bedinke.

Gegeve; 3 fibberwarie 2019, door de Kanselieriraod vaan **CV de Braniemeekers**